

5. november 2020

UKA 2020/167

Nunani Avannarlerni Killerni “Immamik Minguitsuutitsinermut Nersornaammik” pilersitsinissamik aningaasaliinissamillu taperseeqqullugit Savalimmiuni, Kalaallit Nunaanni aamma Islandimi Naalackersuisut Nunat Avannarliit Killiit Siunnersuisoqatigiiffiannit kaammattorneqarput, taanna piujuaannartitsinermik tungaveqarluni immamit pisuussutinik aqutsinissamik atuinissamillu kiisalu immami avatangiisit peqqissuunissaasa pisuussuteqarluarnissaasalu nukittorsarneqarnissaanik immikkut suliniuteqartunut iliuseqartunullu tunniunneqartassaaq.

(Aallartitat siulittaasuat Vivian Motzfeldt)

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalackersuisunut nunani avannarlerni killerni “Immamik Minguitsuutitsinermut Nersornaammik” aningaasaliisarnissaat siunertaralu kaammattuuta Siumumiit imaattumik naatsumik oqaaseqarfigissavarput.

Nunatsinni pinngortitap mingueqisup illersorneqarnissaa imaannaangitsuuvoq nunatsinnimi pinngortitaq isorartoqaaq tikikkuminaassinnaasarlunilu. Siumup anguniartuartaapaa nunatta avatangiisittalu mingutsitsinernut suusunulluunniit illersorneqarnissaa, minnerunngitsumik pisuussutitta paarilluarnissaat piujuaannarnissaallu siunertaralugu.

Nunarsuarmi nunarsuullu immikkoortuini assigiinngitsuni avatangiisitigut ajornartorsiutaasut annertoorsuit issittumi uumassusilinnut sunniuteqapilussinnaasut pakkersimaartinnissaat pingaaruteqarpoq.

Nunatsinni avatangiisit illersorniarlugit suliame Namminersorlutik Oqartussat aammalu kommunit inatsisit peqqussutillu aqqutigalugit malittarisassiorlugit ingerlatsissarput.

Ilisimavarputtaaq aningaasanut inatsit aqqutigalugu “Avatangiisinut Aningaasaateqarfik” pilersinneqarnikuusoq qujaqisumik innuttaasuniit atorluarneqaleraluttuinnartumik. Tamatumap saniatigut aamma “Nordisk Miljøpris” aqqutigalugu nersornaasiisarnerit ingerlanneqartarlutik.

Siumumiik Naalackersuisut akissuteqaataanni maluginiarparput Coronap ajornartoortitsinera peqqutigalugu, aningaasaliinissaq mianersuuteqquneqartoq aammalu aningaasaateqarfiit assigiinngitsut pioreersut periarfissareernerat peqqutaatinneqarluni. Taamaattumik Siumumiik akisussaassusilimmik aningaasanik ingerlatsinissaq aammalu aningaasaateqarfiit assingusut nunatsinnut innuttaasunullu toqqaannarnerusumik iluaqutaasinnasut pioreermata Nunat Avannarliit Killiit siunnersuisoqatigiivisa “Immamik Minguitsuutitsinermut Nersornaammik” tunisisarnissamut aningaasanik immikkoortitsinissamik siunnersuutaat ilalinngilarput.



Maluginiaqqussavarpullu tamanna pinngortitatta aammalu avatangiisitta mianerinninnissaanik tapersersuinninnertut paasineqassanngimmat.

Jens Danielsen, Siumut